

# याकोब

## याकोब लिहि कीता चिटि

**1** बगवंतल अनि येसु किरिस्तु पर्बुनोर सेव्कल याकोबना आंदुन. दुनिया पूरो पग्रे मासि मंवलिर बगवंतनुर बक्तलिर्कुन\* दंडोस दोसि, इद चिटि लिहि कीसेर मंतोन.

### बरोसा अनि बुदि-गियन

2-3 नावुर दादलिर-बायिक्निट! मीकुन तक्लिब्क अनि दुक्सड वातेके गिर मिरट वेले आनंद्ने मंट. बरोसते अव तक्लिब्क अनि दुक्सन मेय्सि मुने सोत्तेके, मीकुन उंडे इचुर वोर्चल्लगुन अब्बंता इन्जेर मीकुन टावये. 4 मिरट वोर्चल्ल गुंतगा बडे मासि गट आतेकेन, चोकोटे बरोसतगा गट आसेर बे-कसुर वालिर आया परंतित.

5 मिहगटल बोने बुदि-गियन सेल्वेके वोर बगवंतन कोरना. अहन कोर्तोर वोन, राडि सिव्वक्ने कोर्ततुन तेर अदिक सिव्वल बगवंतल आंदुर. 6 बति बगवंतन कोर्नेके, सींतोरो सियोरो इन्जेर अनुमानम्ना बरोसते तल्कमट. अनुमानम्ने तल्कवल सम्दुर्तड हेल्वड बहन वडिदे तेदंतडो अहन मंदंतोर. 7-8 आतोर रंड तीक्नेसोन्च किय्वल मायनल तंवा सर्दगा बस्केन बरोबर ताका परोर. अदेन साटि पर्बुनगटल तनकुन उंडे बतय पुट्मड मंदर इन्जेर आतोर आसा किय्वा.

### गरिब अनि दनेवंतल

9 गरिब बक्तलिर तमकुन बगवंतल सीता डगुर-पांदुन पिय्सि, आनंद्ने मंदा लागर. 10 बति दनेवंतलिर बक्तलिर तमकुन बगवंतल सीता चुडुर-पांदुन पिय्सि, आनंद्ने मंदा लागर. बारितेके वूर गिर जाडिता पुड्डुन दात साया लागर. 11 पोड्ड पेसियंता, अद येदिते जाडि वतंता इवल माकुन टावये. जाडि पुड्डा सोबता रूप करब आंता. अहने दनेवंतलिर बक्तलिर गिर तम्बड काम्क कीसेर, मनेकेन नासेडम आंतेर.

### करब गुन्क बगवंतनल वायोड

12 दुक्सड वानेके अवेन वोर्चि मेय्सि, मुने सोंवलिर बक्तलिर आसिर्वाद्येततेर. तनकुन पेर्मा किय्वलिरकुन बगवंतल वागदन

सीतोर अद जीवता किरिट\* दुक्सड वानेके, बरोसतगा गट निल्लुरकुन पुटंता. 13 बोनय आयि कसुर कियन साटि मन वित्तेके, बगवंतले नावा मंदुन वितुसेर मंतोर इन्जेर इंवा. बारितेके बगवंतल तंवा मंदुन कसुर कियन साटि वितुसोर अनि मीवा मंदुन आतल बुदि पुटुसोर. 14 बति हर मायनल तंवा कसुर कियना इवल बुदिते, नियतुन बहके मासि करब्ना आसतगा कोंडे मांतोर. 15 आतल करब्ना आसा पिंडमुन दात बडे मासि, पाप इंवडुन जल्मा सींता. अद पाप बेर्सनचोर बेर्सि, आत्मता सावदुन जल्मा सींता.

16 नावुर लाडुनुर दादलिर-बायिक्निट! मिरट पसे माय्मट. 17 हर उंदि चोकोट्ना अनि पूरो बर्पूर वाले वस्तु, स्वर्गगा मंवल बगवंतनल वासेर मंता. वोरे बाबो हाबडगा वेड्चि सिव्वलिकुन निव्वि कीतोर. अव वस्तुना वेड्चिते दड्मि मारियंता, बति बगवंतल बस्केट्के मारियोर. 18 बगवंतल तंवा सते गोस्तिटुन हिंदल तना निव्वि कीता कलितगा मरट पंटता मोदोडा ईसतुन दात\* मंदना इन्जेर मिय्तोर.

### सते गोस्तिटुन केन्चि अद गोस्ति तीर काम किय्वल

19 नावुर लाडुनुर दादलिर-बायिक्निट! इद गोस्तिटुन करि कीमट. हर मायनल केन्जले तयर मंदना अनि वड्क्नेके सोन्च कीसि जोक्सि वड्कना. वेय्ने सोडुन वाय्वा. 20 बारितेके मायनना सोड बगवंतल इचा किय्वल, नियतना सरि ताकुसा परो. 21 अदेन साटिने मिहगा मंवल करब-पांदुन अनि बगड-नियतुन सुटि कीसि ताकट. मीवा मन-दिलतुन रोपो बगवंतल इर्ता अद गोस्तिटुन पिय्सि ताकट. इद गोस्ति मीकुन बचि किया परंता.

22 बगवंतना वचन सिरिप केन्ज्वले आयो बति, अद वचन वेहता तीर ताकना. अहन ताक्वेके मीवा मिरट मोसेम कीतुर आंतिट. 23-24 बगवंतना गोस्ति केन्चि, अद गोस्ति तीर कियोर वोर मायनल आर्सतगा तंवा मोकोम सूड्सि, तना बहन मंतोरो इवल बहिर सोन्जि, येंटेने मरुड्वन दात मंदंतोर. 25 बति बगवंतना वचंतुन दिहंते सूड्तेके तान्गा बतय कमि

\* 1:1 बगवंतनुर बक्तलिरकुन इत्तेके, बारा कांदनुर यूदुल्कना जातितुर लोकर इन्जेर ग्रीकु बासते मंता. \* 1:12 जीवता किरिट इत्तेके स्वर्गगाबस्केट मंवल जीवा सेलेके मोक्सेम. \* 1:18 यूदुल्क पंडुस्ता पंटता मोदोडा ईसा बगवंतनय आंद.

सेले. पर्जतुन अद मोक्डो सुटि कियुसा परंता. अदेन साटि बोर्ते मायनल अद वचंतुन केन्चि, अद वेहता तीर कींतोरो, अद वचंतुन वोर बस्केन मन्गोर.बति अद वेहता तीर पिसंतोर. आतोर मायनल बद काम कीतेके गिर बगवंतल वोन आसिर्वाद सींतोर. <sup>26</sup> बोर्ते तंवा तनय बक्तना इन्जेर वेहचेर, तंवा वेन्जेडुन जरब्ने इरा परोरो, वोर तंवा तनकुन मोसेम किय्वल आंतोर. वोना बक्ति बततुने कामि सियो. <sup>27</sup> रांडे वेय्लोकुन अनि पोसटि मरि-मियडुन तक्लिब मनेके, वूरकुन मदत किय्वल बक्तितुने बगवंतल कोर्सेर मंतोर. अहने इद दुनियता पाप तनकुन तुंड्वक्ने सुदुड मंवल बक्तितुन गिर बगवंतल कोर्सेर मंतोर. इहिन कल्ति सेल्वक्ने मंवल बक्तिये करल बक्ति आंद.

### चुडुर-पांदे सूड्वा

**2** नावुर दादलिर-बायिक्निट! मय्मते जगा जगा मिड्चेर मंवल, येसु किरिस्तु पर्बुन पोरो बरोसा इर्वलिर मिरट, बोने बेद-बाव्ते सूड्मट. <sup>2</sup> नमुनतुन वोरोर मायनल सोनेतड मुदड अनि बारितड कण्डिड केर्सि अनि उंडे वोरोर माक्डे मातड कण्डिड केर्सि, मिरट मीरे माय्वल रोटगा वातेर इंटु. <sup>3-4</sup> अस्के मिरट बारितड कण्डिड केर्सि सजे मासि वातोन सडा, “दादा! निमे इद चोकोट्ना कुर्सितगा उदा” इन्जेर वेह्चि, गरिबुन सडा, “निमे अगा निला सेलेके इगे बूड उदा” इन्जेर वेहतेके, मिरट बेद-बाव तोह्चि, करब बुदिते तस्वा कीतुर आंतित.

<sup>5</sup> नावुर लाड्नुन दादलिर-बायिक्निट! इद गोस्टि केन्जट. इदेन मुनेन तनकुन पेर्मते बक्ति किय्वलिरकुन तंवा राज सींतोन इन्जेर बगवंतल वाग्दन सीतोर. अदेन साटि बगवंतले दुनियतुरा नदुडुन मुने गरिब मंवलिरकुन बरोसतगा दनेवंतलिर कींतोर. अनि वोरे तंवा राज्ना ईसा येतना इन्जेर वूरकुन नेमि कीतोर. <sup>6</sup> मिरट वीर गरिब लोकुरा हिजत वोसेर मंतिट. बति मी पोरो अदिकार ताकुसेर, मीकुन कोट्क्नगा\* हव्लि किय्वलिर वीर दनेवंतलिर आंदिर कि आयुर? ओहो, वीरे आंदिर! <sup>7</sup> मिरट बक्ति किय्वल किरिस्तुना चोकोट्ना पोरोडुन रेह्चि वड्क्वलिर वीरे दनेवंतलिर आंदिर कि आयुर? ओहो, वीरे आंदिर!

<sup>8</sup> “नीवा नीकुन पेर्मा कीतपे नी आजु-बाजुतुरकुन गिर पेर्मा कियना” इवल दर्मा-ग्रंत्नमुके हुकुमुन मिरट पिप्सि ताक्तेके, अद चोकोट्नय गोस्टि आंद. <sup>9</sup> बति उंदि मोका मिरट बेद-बाव तोह्किट्ते, दर्मता कानुंतड हुकुमकुन पिप्सि बय्मन आसि पापिर आंतित. <sup>10</sup> बारितेके बोरे आयि अद कानुंतगा मंवलिक सम्दो हुकुमकुन पिप्सि ताक्सेर, उंदि हुकुमुन टूटि कीसि

ताक्तेके गिर, वोर पूरो दर्मता कानुंतड हुकुमकुन पिप्सि ताक्मकि इवल बदनम आंतोर. <sup>11</sup> बारितेके “पीर किय्वा” इन्जेर वेहतोर वोरे, “बोनय जीवा गिर येत्वा” इन्जेर वेहतोर. अदेन साटि वोरोर मायनल पीर किय्वेके गिर उंदि मोका बोनय जीवा येत्तेके, वोर अद कानुंतड हुकुमकुन बय्मन आसि ताक्तेके आंतोर.

<sup>12</sup> अदेन साटि माकुन मोक्डो सुटि किय्वल कानुंतुन पिप्सि, वड्क्तुन हिंदल अनि काम कीतुन हिंदल बगवंतल तस्वा किय्वल मंतोर इन्जेर दिहंते ताकना. <sup>13</sup> बारितेके दुसुर पोरो दया तोहुर वूरकुन बगवंतल तस्वा कीनेके, वोर पोरो गिर दया तोहोर. बति बूर्ते दुसुर पोरो दया तोहंतेरो, बगवंतल तस्वा कियन नेटि वूर वेले संतोस अनि आनंद्ने मंदंतेर.

### बरोसा अनि काम कीसि तोहवल

<sup>14</sup> नावुर दादलिर-बायिक्निट! “नाकुन येसु किरिस्तुन पोरो बरोसा मंता” इन्जेर वोरोर मायनल वेहतोर इंटु बति, अद बरोसा मत्ता तीर काम किय्वेके, आतल बरोसा बततुने कामि सियो. आतल बरोसा मायनन बचि किया परंता कि बतल? बचि किया परो. <sup>15</sup> नमुनतुन वोरोर दादले आयि, सेलेके उंदि बायिय आयि, तिले तिंडि सेल्वक सेलेके, पोंडले कण्डिड सेल्वक मत्तेर इंट. <sup>16</sup> अस्के मिरट वोर दादन सेलेके, अद बायिन बतय मदत किय्वक्ने, वूर सडा, “सांतिते सोन्जि, पेटिमेन तिंटु अनि मेंदोल-मेन कण्डिड पोंडट. अस्के मीकुन गर्मि वांता. इव सम्दो मीकुन बगवंतल सींतोर” इन्जेर सिरिप गोस्टिनेन वेहतेके बतय पाय्दा पुटो. <sup>17</sup> अदे तीर्दे बरोसा मंता इन्जेर वेह्चि, बरोसा मत्ता तीर काम किय्वेके गिर आतल बरोसा वोंटरि आसि सांता.

<sup>18</sup> बति नमुनतुन बोरे ना सडा, «नाकुन येसुन पोरो बरोसा मंत» इंदनुर्ते, अस्के नना, «नावा बरोसतुन चोकोट्नड काम्क कीसि तोहंतोन्» इन्जेर वोन वेह्चि, «नीवा बरोसतुन काम किय्वक्ने तोहा पर्कि कि बतल?» इन्जेर पूसि कींतोन. <sup>19</sup> बगवंतल वोरोरे मंतोर इन्जेर निमे बरोसा किय्वल चोकोटे बति, बतल पाय्दा? अहन बूत्क गिरे बरोसा कीसेर, वेरिसि तरा तरा आसेर मंतड.

<sup>20</sup> एहे पिसटि! काम कीसि तोहवक्ने मंवल बरोसा बततुने कामि सियो इंवडुन गवा प्हजे कि बतल? <sup>21</sup> मा तोत्तोर बाबो अब्राहमुन हेतु कीम. वोर तंवोर मरि इसकुन बलिदान सिय्वल बोव्लत पोरो बलि सिय्वले आनेकेते, बगवंतल वोना कार्यतुन सूड्सि, वोन नियत्नोर इन्जेर वोप्पोर कि सेले? <sup>22</sup> वोना बरोसतुन केय्दे कीसि तोहवल मिरट करि कींतित

\* 2:6 सेलेके पन्चद्वक्नगा.

कि सेले? चोर तंवा बरोसा बातल इंवल केय्दे तोहतोर.  
 23 “अब्राहम बगवंतन पोरो बरोसा इतोर. अदेन हिंदले वोन नियत्नोर इन्जि बगवंतल वोप्नोर” इंवल दर्मा-ग्रंत्नावचन पूरे माता. अद तरिकते अब्राहमुन बगवंतनोर सोप्नल इंवल पोरोल वाता. 24 इद सूड्सि, मायनल सिरिप तंवा बरोसतुन हिंदल आयो बति, तंवड कामकुन हिंदले, नियत्नोर इन्जेर बगवंतल वोप्नोर इंवल मिरट करि कीतिट.

25 अदे तीर्दे, राहबु# इंवल लन्जे वेय्लो इज्रयेल देसूर कब्रियलिरकुन तंवा रोम मकुसि, सम्दो मान-मर्यदा कीसि दुस्रो सरिय सारि कीता. अद चोकोट्ना कामुन हिंदल, «नियत्ना वेय्लो» इन्जेर बगवंतल वोप्नोर. 26 बहंते परन सेले अद मेंदोल साता लेकते वांतयो, अहने चोकोट्ना काम कीसि तोहुर वूरा बरोसा गिरे साता लेकतेन वांता.

### मीवा वेन्जेडुन जरब्ने मनल करुसट

**3** नावुर दादलिर-बायिक्निट! मिहगटल वेलेटिर बोदा वेहवलिर आय्मट. बारितेके बोदा वेहवलिर माकुन वेले कटिता तस्वा मंदंता इंवल मीकुन टावये. 2 मरट सम्दिर गिरे बचोडो गल्लिड कींतट. तना वडुक्वलिक गोस्तिनगा उंदि गिर तप कियोर चोर बर्पूर गुन वाले मायनल आंतोर. आतोर मायनल तंवा पूरो मेंदोडुन जरब्ने इरा परंतोर. 3 मरट ताकुस्ता तीर ताकना अनि मावा जरब्ने मंदना इन्जेरेंते कोदन\* वेसुनि दोहंतट. 4 अहने डगुर रूकता नमुना येत्तेके गिर, बेय जोर्ते वडि वासि तान दुसैर वोंता. बति तान ताकुस्वल मायनल अद रूकतुन पेजे मंवल चुडुसि कटेतुन\* तिरुस्तेके, तना बेके सोंदना इत्तेके हके तान मलुसा परंतोर. 5 अहने वेन्जेर मावा मेंदोडगा चुडुसि बागम आंद. बति अद बेय डगुक डगुक गोस्तिड वड्कंता. अदे तीर्दे, चुडुसि मिन्गुल डगुर केडतुन बचोर-बहन डुंडुसंतयो सोन्च कीम्ट.

6 मावा वेन्जेर गिरे उंदि तड्मित दातनय आंद. करब्ने निन्चि मंवल मावा मेंदोडगा उंदि बागम आसि मंता. अद वेन्जेर करबुन पूरो मेंदोडगा पग्रि कीसि, मायनना जिन्गानितुन तड्मित दात लावि कींता. अहन लावि कियवल सक्तितुन अद वेन्जेर पातड्तल\* येतंता. 7 सम्दि जंवरकुन, पिटे-पुरडुन, पुर्ग-बुसितुन, सम्दुरतगा मंवलिक जिब्रस सम्दोतुन इदेन मुने अनि इंके गिर मायनल जरब्ने इर्सेरेन मंतोर. 8 बति वेन्जेडुन

इंके वेरि बोरे तंवा जरब्ने इरा पर्मकि. अद वेन्जेर जीवा तेंडवल विक्ने निन्चि अविक्ने करब कीसेरेन मंदंता.

9 इद वेन्जेडेन मरट पर्बु आय्वल बाबो बगवंतन डगुर-पान सींतट. इदे वेन्जेडे बगवंतना रूप्ने पुट्तोर मायनन सापेना सींतट. 10 आसिर्वाड्नि सापेना उंदिय तोड्दल बहिर वासेर मंतड. नावुर दादलिर-बायिक्निट! अहन मरट मंवा. 11 सोवोर येर अनि चोकोट्ना येर बस्केट्के उंदि जलतल पूटे मायोड. 12 नावुर दादलिर-बायिक्निट! अन्जुरि मरतुन मर्का पंडिड\* बस्केट्के सादोड. अहने आडुर वेलितुन अन्जुरि पंडिड बस्केट्के सादोड. अदे तरिकते, सोवोर येता जलतल चोकोट्ना येर पूटे मायो.

### बुदि-गियन वालिर

13 बुदि-गियन वालिर अनि समज्दार्क मी रोपो बोरे मंतेर कि? अहन मत्तेके वूर सते-पांदे ताक्सेर, बुदि-गियन सीता अद चुडुर-पांदुन पिग्सि, वूरड कार्पन तोहट इंट. 14 उंदि मोका मीवा दिलतगा कुटा कुटा अनि लाल्सल गुंते मन्जि, डगुक डगुक गोस्तिड वेहचेर सतुन मकुसिय्मट. 15 मिहगा मंवल ईतल बुदि-गियन स्वर्गनल रेय्सि वाय्मकि. इद मीकुन दुनियतल वाता बुदि-गियन आंद. ईतडगा बाव-बक्ति सेले. इद सय्तंदा बुदि-गियन आंद. 16 बहन इत्तेके बगते कुटा कुटा अनि लाल्सलिक गुन्क मंदंतडो, अगा जगडड लोलिड अनि सम्दो तीर्कनक्करब काम्क मंदंतड.

17 बति स्वर्गनल वाय्वल बुदि-गियन वेले पवित्रा आंद. अद बुदि-गियन सांतितुन पेर्मा कींता. अद बोने बतय इंवक सादु आसि मंदंता. अद बुदि-गियन वेहता तीर केन्जंता अनि दयते सूडंता. अनि अद चोकोट्नाड काम्क कीसेर बेद-बाव तोहवक मंदंता. अद बुदि-गियन सतेमुन पिग्सि ताकंता. 18 सते-पांदे अनि सांतिते ताक्वलिर अद विजतुन वीच्चि, सत्ना अनि सांतिता पंटतुन कोयंतेर.

### बगवंतन करुम वरट

**4** मिहगा जगडड अनि लडेय्क बततुन हिंदल जर्सेरमंतड? मीवा दिलतगा पुट्वलिक आसन उंदितुन उंदि अर्सि वाय्वा सोन्जिने इव जर्सेरमंतड. 2 मिरट आसा कीकिट बति, अद मीकुन पुटो. अद कुटा कुटा गुंता आसतुन साटि मायनन

\* 3:3 ग्रीकु बासते इहिन लिहि कीसि मंता: कोडता मुस्करितुन लगम दोहंतट. \* 3:4 तेलुगुते अद चुडुसि कटेतुन «चुक्कानि» इंतेर. \* 3:6 पातड्तल सेलेके सय्तंदल इन्जेर मंदंता. \* 3:12 ग्रीकु बासते ओलिवा पंडिड इन्जेर मंता.

# 2:25 येहोसुवा 2:11

जकंतिट. जगडड अनि लडेयक कींतिट बति, आसा कीकिट अद मीकुन पुटो. मिरट कोर्ता अद मिहगा मनो. बारितेके बगवंतन मिरट तल्लिक्वट. <sup>3</sup>मिरट बगवंतन तल्लेके गिरे अद मीकुन पुटो. बारितेके मीवा सुक-बोगुन साटि कर्चिं कियले करब्ना आसते तल्लकंतिट.

<sup>4</sup>इद दुनियतड सुक-बोगुन सडा दोस्तन कीतेके, बगवंतन पेर्मा कीतप आयो बति, पीर कीतप आंता इवल टावा सेले कि बतल? इद दुनियतुर सडा दोस्तन कीका इवल, बगवंतन पगा-दारल आंतोर. <sup>5</sup>“बगवंतल मा सम्दिरकुन सीता, अद आत्मते मरट तंवय बक्ति कियना” इन्जेर दर्मा-ग्रंत्नगा, वटि आगमे लिहि कीसि मंता इतिट कि बतल? <sup>6</sup>बगवंतल माकुन वेले पेर्मता-दयते सूड्सेर मंतोर. अदेन साटिने दर्मा-ग्रंत्नगा, “बगवंतल गर्वते मंवलिरकुन उल्टा तिरियंतोर.

बति कमि-पांदे मंवलिर पोरो पेर्मता-दया तोहंतोर”#  
इन्जेर लिहि कीसि मंता.

<sup>7</sup>अदेन साटि, बगवंतन मुने चुडुर-पान कीसि मंट. सयतंदुन उल्टा तिरियट. अस्के वोर सयतन मिहगटल परर आंतोर. <sup>8</sup>बगवंतन करुम वरट. अस्के बगवंतल मी करुम वांतोर. पापेस्तलिर्निट! मीवड पापकुन नोरट. बहके मातुर्निट! मीवड दिलकुन सुडुड-पान कीमट. <sup>9</sup>पापेस्तलिर्निट! विचर्ते अनि दुक्सते मंट. जोर्ते आडट. कव्वडुन बड्लि आड्सेर अनि आनंदुन बड्लि दुक्सते मंट. <sup>10</sup>पर्बुना नदुडुन मुने मीवा मिरट चुडुर-पान कीसि मंट. अस्के पर्बु मीकुन डगुर-पान सींतोर. <sup>11</sup>दादलिर-बायिक्विट! मीवा मिरट वोरोन वोरोर बय्मते राड्मट. तंवोर सोप्पन राडि सीतेके आयि सेलेके वोन पोरो तस्वा कीतेके आयि, वोर मायनल दर्मता कानुंतुन बय्मन आतोना लेकते वांतोर. मीवा काम सिरिप अद कानुंतुन पिप्सि ताकना. अद कानुन चोकोट्ना सेलेके वायुट्ना इन्जेर तस्वा कियवल मीकुन हक सेले. <sup>12</sup>पर्जंतुन पोरो नाय्दा तस्वा कियवल अनि दर्मता कानुंतगा हुकुम्क लिहि कियुस्वल वोरारे बगवंतल आंदुर. पर्जंतुन बचि कियवल अनि नासेडम कियवल गिर वारे आंदुर. ते आजु-बाजुतुर पोरो सिक्सा वाटट इन्जेर वेहले नीकुन बोर अदिकार सीतोर?

### डगुक डगुक गोस्टिड वेहमट

<sup>13</sup>केन्जट! “नेड सेलेते नाडि बत्तेर उंदि चहर्दे सोन्जि, अगा उंदि साल वेरि मंदंतोम. वरट! अगा बेपरि कीसि कोतड वेले कमय कीकट” इन्जेर वेहवलिर्निट करि कीमट. <sup>14</sup>नाडि बतल जर्गंतयो मीकुन टावा सेले. मीवा जीवतुन बारेते सोन्च

कीमट. मिरट जुलुक दिसि उंडे जुलुक्ने मयड आसि सोंवल, पोयता दुहरतुन दातुनर आंदिट. <sup>15</sup>अहन इंवडुन बड्लि मिरट, “पर्बु जीवते इर्तेके, इद कीकोम अद कीकोम” इन्जेर वेहना. <sup>16</sup>बति मिरट अहन किय्विट. लांडि-लबड डगुक डगुक गोस्टिड वेहचेर गल्लिड कींतिट. <sup>17</sup>अदेन साटि चोकोट कियना इवल, टावा मन्जि गिर चोकोट कियोर वोन पाप लागंता.

### दनेवंतलिरकुन दम्कि सियवल

**5** ये दनेवंतलिर्निट, केन्जट! मिरट दुक्सते आड्सेर किलियट. बारितेके मीकुन गाचर-गंडल्क वाय्वलिक मंतड. <sup>2</sup>मीवा दन-दवल्लत कडियंता अनि मीवड पाडुक वेलुम पियंतड. <sup>3</sup>मिहगा मंवल सोने अनि कूरा चिलिम पियंता. अद चिलिम मी पोरो उल्टा गवा वेह्चि, मीवड मेंदोलकुन तड्मित दात डुंडुसंता. इव आक्रितड दिवोस्क्ने गिरे मिरट वेले दन-दवल्लतना डीग वाड्सेर मंतिट. <sup>4</sup>केन्जट! मी बहुक्नगा काम कियवलिर बूय्तलिरकुन, मिरट बूति सियवक्ने पसि कीतिट. वूरड बूतिड मी पोरो पिरदि कीसेर मंतड. वूर बूय्तलिरा आड्वल स्वर्गा दलम्नोर पर्बुनड\* केवकुन केन्जा वाता. <sup>5</sup>बोमित पोरो मीकुन पसंद वाता तीर सुक-बोग्ने पिसेर, कोयवल दिनमुन साटि, मीवड दिलकुन कोड्युसि तयर कीसेर मंतिट. <sup>6</sup>मिरट नियत्ने ताक्वलिरकुन सिक्सा वाट्सि, वूरकुन जक्तिट बति, वूर मीकुन मर्ला बड्मकि.

### सम्दोतुन वोर्चि मुने दायना

<sup>7</sup>अदेन साटि दादलिर-बायिक्विट! पर्बु मल्लिस वानल वेरि, मिरट वोर्चि चोकोटे सूड्सेर मंट. बहन इत्तेके, वोरोर केतिदारल तंवा बोमितगा वाट्वल चोकोट्ना पंटतुन साटि, बहन सूड्सेर मंदंतोरो दिहंते करि कीमट. वोर केतिदारल मोदोडा पिर वासि\* पंटा पिरंता अगटल्ले बेर्सि, पंटा कोयले वानल वेरि वोर्चिकुन चोकोटे सूड्सेर मंदंतोर. <sup>8</sup>मिरट गिर मंदुन गट कीसि, वोर्चि सूड्सेर मंट. बारितेके पर्बुना मल्लिस वाय्वल वकत करुम वासेर मंता. <sup>9</sup>नावुर दादलिर-बायिक्विट! वोरोन पोरो वोरोर चह्चिड वेहमट. अहन वेहतुरकुन पर्बु सिक्सा वाटंतोर. केन्जट! वोर नाय्दा तस्वा कियवल अदिकारि वेय्ने वाय्वल मंतोर.

<sup>10</sup>नावुर दादलिर-बायिक्विट! पर्बुन बारेते वेहतुर पर्वत्तलिर तक्लिबक बोगे मातेर. वूर पर्वत्तलिरा नमुना येच्चि मिरट ताकट. <sup>11</sup>तक्लिबक वोर्चि बरोसते तात्तुरकुन आसिर्वाय्चेतुर

\* 5:4 स्वर्गा दलम्नोर पर्बुनड इत्तेके सक्ति वाले बगवंतल.

\* 5:7 अद जागतगा उर्सन वकत्ने जरसि पिर वांता अनि पंटा कोयन मुने बेय पिर वांता.

# 4:6 गियंतड गोस्टिना 3:34

इंतट. योबुना वोर्चलगुंतुन बारेते केन्चि मंतिट. पर्बु वोन आक्रित बातल इनम सीतोर इंवल मिरट सूड्तिट. पर्बु वेले दया अनि किवुल वाले आंदुर. <sup>12</sup>नावुर दादलिर-बायिक्निट! सम्दिन तेर मुके बतल इत्तेके, स्वर्गना पोरोडेन आयि, बोमिता पोरोडेन आयि, उंडे दुस्रो बततय पोरोडेन आयि, मिरट वोट वाट्वा. सिरिप बतल मंता अद वेहट. अहन मत्ता तीर वेहतेकेन बगवंतल मीकुन सिक्सा वाटोर.

<sup>13</sup>मिह्गटल बोरे आयि तक्लिब्वनगा अर्सि मत्तेके, वोर पार्तना कियना. आनंद्ने मत्तोर वोर, बगवंतन पार्तना-विंति कीसेर पाटड वारना. <sup>14</sup>मिह्गटल बोरे आयि येड्कि-दुक्ने मत्तेके, चर्चितुर पेदोलकुन वोर केयुसना. वूर वासि पर्बुना पोरोडे निय सोक्सि, वोन साटि पार्तना कियना. <sup>15</sup>अहन बरोसते वूर पार्तना कीतेके, वोर दुकेलल चोकोट आंतोर. पर्बु वोन चोकोट कींतोर. उंदि मोका वोर पाप्क कीसि मत्तेके, वोनड पापकुन पर्बु मापि कींतोर. <sup>16</sup>अदेन साटि बवे

पाप्क कीसि मन्किट्ते, बोनड वोह्क पाप्क मी नड्डुम मिरट वोपट अनि वोरोन साटि वोरोर पार्तना कीम्ट. इदेन हिंदल, मीवा तबियत चोकोट आंता. नियत्नोना पार्तना वेले सक्तिते मन्जि बचोरो चोकोट किया परंता.

<sup>17</sup>येलियल मा दात्नोरे सादरन मायनल आंदुर. पिर अर्वा इन्जेर तंवा मंदे पार्तना कीतोर. ते सडे मूंद साल्क वेरि, बोमित पोरो पिर अर्मकि. <sup>18</sup>अद आता पेजे पिर अरना इन्जेर मर्ला पार्तना कीतोर. अस्के हाबर पिरदुन अरुस्ता अनि बोमि तन्गा उर्स्टडपंटड पंडुस्ता.

<sup>19</sup>नावुर दादलिर-बायिक्निट! मिह्गटल बोरे आयि सते सरदुन बह्के मातेके, वोन मल्लिस सत्नगा तत्तेके इद गोस्टितुन करि कीम्ट. <sup>20</sup>पापेस्तन पाप्ना सरितल सते सर्दे मलुस्तोर वोर, पापिना आत्मतुन मरंतल तपुसि, बचि कियुस्तोर आंतोर. इदे आय्वा पापिनड पापकुन बगवंतना केय्दे वोर मापि कियुस्तोर आंतोर.